

Waraga ka Paulo both Jö Galatia

Köp na tye i waraga ka Paulo both jö Galatia

Na calö emuth na bër i kom Kiricito n'ëcakö titö ëka ëgamö i kin jö n'onwongo ba obedo gini Eyuda, peny öya ka cë dhanö twërö lübö cik k'Eyuda më bedo dhanö n'oye Kiricito adyer. Paulo okobo cön ni man onwongo ba miterë—ni i adyer, köp na pîrë tək pi kwö i Kiricito onwongo obedo yee, na nwongo eketho jami kibëc atir k'Obanga. Entö i kin jö n'oye Kiricito kibëc na tye i lobo Galatia na tye i Acia, n'onwongo tye i thë löc ka jö Roma, kunön onwongo jö na pyem ki Paulo kobo gini ni dhanö myero ölüb cik k'Eyuda ka mitö bedo n'atir k'Obanga.

Waraga ka Paulo both Jö Galatia onwongo ëcöo më dwongo cen jö n'onwongo ëbwölögi ki pwony më twodo i yee n'atir ëka i kwö n'Obanga mitö. Paulo öcakö twak nakun gwökö twërö mërë n'ecwodo ën ködë ni akwëna ka Yecu Kiricito. Paulo ocere ni cwodo mërë më bedo akwëna öya ki both Obanga, pathi ki i twërö ka dhanö mörö, ëka tic mërë na pîrë tək onwongo obedo pi jö na ba obedo Eyuda. Cë ën okobo ni yee kəkən ënë miö jii twërö bedo n'atir k'Obanga. I ajiki më cura gini Paulo onyutho ni kite ka jö n'oye Kiricito wotho na bër ki mar n'adwogi mërë yaa ki i yee i Kiricito.

Moth n'öya ki both Paulo

¹ Waraga ni öya kī both Paulo n'obedo akwëna. Pathi jö mörö ënë oora, ëntö Yecu Kiricito ëka Obanga Apap n'ocero Yecu kī i kin jö n'öthöo.

² Utmego kibëc na tye gini kanya acël köda kany ömiö mothgi.

Both jö n'oye Kiricito kibëc na tye i Galatia.

³ Obanga Apap onu ëka Rwoth Yecu Kiricito ömiiwu gum kī kuc.

⁴ Kiricito ömiö kwö mërë pi bal onu, kite n'Obanga Apap onu onwongo öyübö ködë, ëk ëlar onu ökö kī kom gin na rac më karë ni.

⁵ Dheo obed both Obanga naka naka. Amën.

Emuth na Bër nökenë ope

⁶ An auro kite na un ilökërë unu ködë piöpïö, ikwërö unu ngat na yam ocwodowu i kica ka Kiricito, ëka itye ka lökërë unu i emuth na bër nökenë na path k'Emuth na Bër.

⁷ Adyer Emuth na Bër nökenë ope, ëntö tye jö mökö na tye ka balö thamawu ökö nakun mitö gini lökö Emuth na Bër i kom Kiricito dökö gin na path.

⁸ Ëntö kadī bed wan onyo emalaika mörö n'öya kī i polo ötütö niwu emuth na bër nökenë na path k'Emuth na Bër na yam wan ëtütö niwu ca, myero ëcën dhanö nön ökö.

⁹ Na calö wan ekobo niwu cön, pod anwö kobo dökī: Ka ngat mörö tye ka titö niwu emuth na bër nökenë na path k'Emuth na Bër na yam igamö unu, myero ëcën dhanö nön ökö!

¹⁰ An kobedini atye ka rangö cwak ka dhanö, onyo cwak k'Obanga? Onyo an atye ka tëmö yomo

cwiny jö? Ka onwongo an pod ayomo cwiny jö, kono an ba abedo atic ka Kiricito.

Kite n'Obanga ocwodo kī Paulo

¹¹ Utmegona, an amitö inge unu nī Emuth na Bēr na an atitö ba obedo gin mörö na dhanö ënë öcakö.

¹² An ba agamö kī both ngat mörö, onyo epwonya ködë apwonya; ëntö an anwongo kī both Yecu Kiricito n'onnyutho botha.

¹³ Un ityeko winyo kite na kwöna na cön onwongo tye ködë i lübö dini k'Eyuda, ëka kite na an onwongo aketho kī can i kom jö k'Obanga n'oye Kiricito ëka atëmö tyekogī ökö.

¹⁴ İ dini k'Eyuda, an onwongo alöö pol jii n'obedo gini nyelwaga ëka alübö thëkwarö ka kwereña kibëc.

¹⁵ Ëntö i karë na bara ënywöla, Obanga onwongo öyëra ökö, ëka ocwoda pī kica mërë. Cë oyomo cwinye

¹⁶ më nyutho nina Wode, ëk atit köp i kome both Erok. İ karë na köp ni ötimërë, an ba acidhö më penyo thama kī both ngat mörö,

¹⁷ an thon ba acidhö yo Jerucalem both jö n'onwongo obedo gini ëkwëna cön nina, ëntö cücüth an acidhö i lobo Arabia ëka kinge adwogo yo Damaciko.

¹⁸ Cë kinge mwaka adek, an acidhö naka yo Jerucalem më rwatërë kī Petero ëka abedo bothe pī ninö apar wie abic.

¹⁹ An ba anënö akwëna mörö ëntö an anënö Yakobo këkën ömīn Rwoth.

²⁰ Adyer i nyim Obanga, gin na kibëc na an atye ka cöönö niwu i waraga ni, twodo mörö ope ië.

²¹ Kinge manön an acidhö yo Ciria ëka Cilicia.

²² İ karë nön, jö n'oye Kiricito na tye gini i Yudea onwongo bara ngeo gini koma.

²³ Gin onwongo owinyo köp i koma kékén ni, “Ngat na yam oyelo onu kobedini dong tye ka titö köp i kom yee na yam en ötëmö türö.”

²⁴ Cë öpakö gini Obanga pi gin na en ötümö i koma.

2

Ėkwëna oyeo Paulo

¹ Cë kinge mwaka apar wie angwën, an adök dökı yo Jerucalem ki Baranaba. An thon awotho ki Tito.

² An acidhö kunön piën Obanga onyutho nina ni myero acidhi ek atit i nyimgi körë ki körë Emuth na Bër na an atitö both Erok. Entö an atimö man i müng both jö na pürgi tæk, ek kür ökwër gini ticna na an atio onyo na dong atyeko tio, ek obed më nono.

³ Tito n'onwongo owotho köda ba ediö ni ek elir, kadı bed ni en onwongo obedo Arok n'öya ki Grecia.

⁴ Köp ni öya piën utmego mökö n'obedo etwodo onwongo oduyo i kinwa më ripö kuc na wan etye ködë i Kiricito Yecu eka më miöwa bedo opii.

⁵ Entö më gwökö köp adyer më Emuth na Bër pirwu, wan ba eyeo ni gin ölööwa kadı na tidi mörö.

⁶ Both jö na pürgi tæk —kite n'onwongo gin tye ködë ba okelo apokapoka mörö botha, piën Obanga ba lengere both ngat mörö pi kite na en tye ködë—jö nön ba ömedö gini gin mörö i köpna.

⁷ Nakaka manön, gin obino ongeö ni Obanga ömia tic më titö Emuth na Bër both Erok, na calö ömiö Petero tic më titö both Eyuda.

⁸ Obanga n'ooro Petero na calö akwëna më tic both Eyuda, ën onwongo thon tye ka tic köda na calö akwëna both Erok.

⁹ Yakobo, Petero ëka Jon, n'onwongo ngere më bedo calö wir ka jö n'oye Kiricito, na dong öniang gini pï gum n'Obanga ömia wan kï Baranaba, gin omotho cingwa më nyutho ni wan kibëc etio kanya acël. Gin oye ni wan myero ëcïdh both Erok, ëka gin ëcïdh both Eyuda.

¹⁰ Gin na gin ökwaöwa këkën ënë ni wan myero ëmëdërë më könyö ëcan, gin n'onwongo an aketho cwinya ni myero atim.

Paulo ocoko Petero

¹¹ I karë na Petero obino yo Antiokia, an ajükö ën wang kï wang, piën ën onwongo ötimö gin na ba tye na bër.

¹² Na bara jö n'öya kï both Yakobo othuno, Petero onwongo cemo kanya acël k'Erok. Ëntö i karë n'othuno gini, cë Petero öcakö jer thenge ëka opokere ökö kï both Erok piën ën onwongo lworö jö na mitö ni ngat mörö këkën n'oye Kiricito myero kono ëlir.

¹³ Eyuda nökenë n'oye öcakö gini lübö kite ka Petero nön më twodo ëka Baranaba thon öcakö lübö kitegi më twodo nön.

¹⁴ I karë na an anënö ni gin ba dökï tye ka tic na lübërë kï köp adyer më Emuth na Bër, an akobo both Petero i nyimgi kibëc ni, "In ibedo Ayuda, ëntö ikwö calö Arok ëka ba ikwö calö Ayuda. Cë dong in itwërö diö Erok ningö më lübö kite k'Eyuda?"

¹⁵ "Onu n'ebedo Eyuda i anywöli ëka ba ebedo 'Erok n'obedo gini ëbal'

¹⁶ engeo nĩ dhanö ba ëkwanö nĩ kite atĩr piën tímö gin na cĩk mütö, ëntö pi yee i kom Yecu Kiricito. Kadi onu thon Eyuda, eketho yee onu i kom Yecu Kiricito ëk ëkwan onu nĩ kite onu atĩr pi yee i kom Kiricito, ëka pathĩ pi tímö gin na cĩk mütö. Pi manön, ba ëkwanö dhanö nĩ kite atĩr piën tímö gin na cĩk mütö.

¹⁷ “Ëntö ka onu ërangö nĩ ëkwan onu nĩ kite onu atĩr pi Kiricito, cë enwongo nĩ onu kikome ebedo ëbal dökĩ, manön twërö nyutho nĩ Kiricito ömïö onu ëdökö ëbal? Adyer pathĩ nĩ kömanön!

¹⁸ Ka an agërö gin na yam arëdhö ökö piny, an amoko këna nĩ an abedo ngat na türö cĩk.

¹⁹ Cĩk kikome ënë ömïö an athöö ëk akwö pi Obanga.

²⁰ An dong etyeko gurona ökö kĩ Kiricito i kor yath arĩa mërë ëka pathĩ an ënë dökĩ akwö, ëntö Kiricito ënë tye ka kwö i ia. Kwö na an atye ködë i koma, an akwö pi yee i kom Wod k'Obanga, n'ömara ëka ömïrë kënë pira.

²¹ An ba akwërö kica k'Obanga, piën ka ëkwanö dhanö nĩ kite atĩr pi cĩk, cë Kiricito öthöö nono abonge tyen köp mörö.”

3

Cobo cĩk onyo bedo kiyee

¹ Un jö Galatia kara iming unu köman! Nga n'örögöwu? Yam cön onwongo enyutho niwu kanya lër kite n'eguro kĩ Yecu Kiricito i kor yath arĩa.

² Ëk an apenywu peny acël: Un inwongo Tipo Naleng pi lübö cĩk, onyo pi yeo köp më Emuth na Bër na un iwinyo?

³ Un kara ïmïng köman? Un ïcakö kï Tipo Naleng k'Obanga ëntö kobedini dong ïmitö unu tyeko kï tøk komwu?

⁴ Un ïlïmö can na pol nono? ï adyer onwongo ba obedo më nono.

⁵ Obanga mïöwu Tipo Naleng ëka tio tango na pol ï kinwu piën ïlübö unu cïk onyo pï yeo köp na un iwinyo?

⁶ ï yoo acël nön, “Abraam oye ï kom Obanga, ëka ëkwanö ën nï kite atïr pï yee mërë.”

⁷ Myero inge unu nï jö na tye kï yee, gïn ënë ëthïnö k'Abraam.

⁸ Cöc na Leng onyutho nï Obanga bino kwanö Erok nï kitegï atïr pï yee. Obanga yam ötitö köp më Emuth na Bër both Abraam cön nakun kobo nïnë nï, “Rok kibëc bino nwongo gum piri.”

⁹ Pï manön, jö na tye kï yee bino nwongo gïni gum k'Abraam n'obedo kï yee.

¹⁰ Jö kibëc na jengere ï lübö cïk ëlamögï dong ökö, piën ëcöö nï, “Cen opodh ï kom jö kibëc na ba lübö gin na kibëc n'ëcöö ï buk më cïk.”

¹¹ Kobedini köp dong ongere ökö nï ba ëkwanö dhanö mörö nï kite atïr ï nyim Obanga pï timö gin na cïk mitö, piën ëcöö nï, “Ngat na kite atïr pï yee bino bedo na kwö.”

¹² Ëntö cïk ba ocung ï kom yee, piën ëcöö nï, “Ngat na timö nakun lübö gin na cïk mitö kibëc bino kwö.”

¹³ Kiricito ënë yam ökökö onu kï ï cen n'opodho ï kom onu piën onu ba ëlübö cïk. Ën obino cë ölökerë ödökö dhanö n'ëlamö nakaka onu, piën yam ëcöö

nĩ, “Cen myero opodh i kom dhanö n'engabö malö i wi yath.”

¹⁴ Ën ökökö onu ëk gum na yam Obanga ömïö both Abraam myero Erok thon onwong gini pi Yecu Kiricito. Ëk onu thon enwong Tipo Naleng na yam ën öcökö pi yee.

Cik ëka gin më Cikäre

¹⁵ Utmegona, ëk kono amii apor më kwö më karë kibëc. Ka jö ariö öcikäre gini i gin mörö na gin omoko, ngat mörö ope na dökï twërö lökö onyo mëdö gin mörö ië.

¹⁶ Obanga yam öcikäre both Abraam ëka akwarë. Cöc na Leng ba okobo ni, “ki both ëkwaëni,” na nyutho jö na pol, ëntö okobo ni, “ki both akwaru,” na nyutho ngat acël këkën na ënë Kiricito.

¹⁷ Ngö na an akobo ene: Cik na dong obino kicen kinge mwaka 430 ba dökï twërö türö cikäre n'Obanga otyeko moko cön ëka thon ba miö gin n'ëcökö rwenyo.

¹⁸ Ka mic n'Obanga miö obedo pi cik, cë nwongo ba lübö cikäre mërë, ëntö Obanga i kica mërë ömïö mic both Abraam pi cikäre mërë.

¹⁹ Pingö ëmïö cik dökï? Cik ebino ëmëdö i kom cikäre ëk türö cik onen ökö kanyalër naka wang n'akwar Abraam n'eketho cikäre pïrë obino. Emalaika ënë yam okelo cik cë ëmïö i cing ngat na ribö dhanö kanya acël.

²⁰ Ngat na ribö dhanö ba mütërë ka ngat acël këkën ënë tye; ëntö Obanga tye acël.

²¹ Cik dong tye ka pyem ki cikäre k'Obanga? Pathi kömanön, piën ka onwongo ëmïö cik na twërö

mïö kwö, cë kwanö dhanö nï kite atir obedo pï lübö cïk.

²² Ëntö Cöc na Leng kobo nï jö kibëc tye ginï i thë löc më bal, ëk gin n'onwongo ëcïkö ëmïi both jö n'oye pï yeegi i kom Yecu Kiricito.

²³ Na bara yee i kom Kiricito enyutho both onu, cïk onwongo gwökö onu na calö emabuc, naka i karë na dong enyutho nï onu yee.

²⁴ Kömanön, cïk onwongo obedo gin na gwökö onu naka Kiricito obino; cë dong ëcakö kwanö onu nï kite onu atir pï yee.

²⁵ Kobedini dong yee i kom Kiricito tye, onu ba dökï ëtwërö bedo i thë gwök më cïk.

Ëthïnö k'Obanga

²⁶ Un kibëc ibedo ëthïnö k'Obanga pï yee i kom Kiricito Yecu.

²⁷ Pïen un kibëc n'onwongo ebaticawu i Kiricito, iruko unu dong Kiricito calö böngü na nyen.

²⁸ Apokapoka ope i kin Ayuda k'Arok, * i kin opii ëka ngat na löörë kënë, i kin ëcwö ëka dhakö, pïen un kibëc itye unu acël i Kiricito Yecu.

²⁹ Ka un ibedo jö ka Kiricito, cë un dong ibedo unu ëthïnö k'Abraam na bino leo gin na yam Obanga öcïkö both Abraam.

4

¹ Gin na an atye ka kobo ënë nï alee jami ka pod obedo athin, bedo na röm aröma k'opii, kadï bed ën obedo won jami kibëc.

² Ën bedo i thë löc ka jö na gwökö ën ëka edite na gwökö jami naka ka karë n'apap mërë öcïkö örömö.

* **3:28** Arok obedo dhanö më Grecia.

³ Man ënë kite n'obedo ködë i kom onu, i karë na onu pod ebedo calö ëthïnö, onu onwongo etye calö opii na tye i thë twër më lobo ni.

⁴ Ëntö ka karë n'ëcïkö kikome örömö, Obanga obino ooro Wode na dhakö önywölö ëka ökwö i thë cïk,

⁵ më kökö jö n'onwongo tye i thë cïk, ëk ëlök onu ëdök ëthïnö k'Obanga ki twër n'örömö.

⁶ Kobedini kite na un dong ibedo ëthïnö k'Obanga, ënë ömïö Obanga ooro Tipo ka Wode i cwinywu na kok ni, “Aba, Apap.”

⁷ Pï manön un ba dökï ibedo unu opii. Un ibedo ëthïnö k'Obanga, ëka ebino mïöwu gin na ën öcïkö.

Par ka Paulo pï jö Galatia

⁸ I karë na un bara ingeo Obanga, onwongo ibedo unu opii ka gin mökö na ba obedo gini obanga kikome.

⁹ Ëntö kobedini dong un ingeo Obanga—onyo ni Obanga dong ngeowu—pïngö un dökï imitö dök cen i opii më bedo i thë twër më lobo ni na görü ëka na piny ölöögï? İmitö unu dök më bedo opiigï dökï?

¹⁰ Un iketho cwinywu më kwero ninö mökö, dwe, karë na papath, ëka mwaka.

¹¹ An atye ki lworö rwök ni ticna kibëc na an atio pïrwu onwongo obedo më nono.

¹² Utmegona, an akwaöwu ni ibed unu calö an, pïen an dong adökö calö un. Un ba itimö gin mörö na rac i koma.

¹³ Kite na un ingeo ni onwongo obedo pi lith koma, ënë ömïö an acakö titö niwu Emuth na Bër.

¹⁴ Un ba ibino icaa onyo ikwëra unu kadï bed lith koma onwongo obedo atëmatëma bothwu,

ëntö ijöla unu na bër na calö an onwongo abedo malaika k'Obanga, onyo na calö an onwongo abedo Kiricito Yecu kikome.

¹⁵ Ngö n'öbalö yom cwinywu kibëc n'onwongo itye unu ködë? An arömö miö caden nï, ka onwongo twërë, onwongo myero igol wangwu ökö ëka imïi unu botha.

¹⁶ An dong adökö langöwu piën an akobo niwu köp adyer?

¹⁷ Jö nökenë ca tëmö gïni kï tæk më lököwu, ëntö thamagi rac. Gin na gïn mitö ënë nï ilökërë unu ökö kï botha ëk icak unu winyogi.

¹⁸ Ka ngat mörö tye kï miti më tïmö gin na bër bothwu, manön kibëc bër, ëntö myero ötïm gïni i karë kibëc, pathi ka an atye kodwu këkën.

¹⁹ Ëthïnöna më amara, pod dökï atye ka dangö arem kodwu calö dhakö na dangö arem i karë më nywöl naka ka Kiricito obedo na tye rwök i kwöwu.

²⁰ An onwongo amitö nï kono abin abed bothwu kobedini ëk aniang i kom gin na myero atwak bothwu, piën thama i komwu dong ocungo wia ökö!

Apor k'Aga ëka Cara

²¹ Un jö na mitö nï cik ölööwu, un ba ingeo ngö na cik kobo?

²² Piën ëcöö nï Abraam onwongo tye k'awope ariö, acël obedo wod ka dhakö n'onwongo obedo opii, ëka acël wod ka dhakö na ba obedo opii.

²³ Wod ka dhakö n'onwongo obedo opii ënywölö i kite më kom; ëntö wod ka dhakö na ba obedo opii ënywölö na calö adwogi më cikërë n'Obanga öcikö.

²⁴ Man ërömö niang ië na calö carolok, mon ariö ni nyutho cikërë ariö. Cikërë acël öya kï i wi

kidi Cinai, önywölö ëthïnö na bino bedo ginï opii:
Dhakö ni ënë Aga.

²⁵ Kobedini Aga cung pï kidi Cinai na tye i Arabia
na röm aröma kï Jerucalem më karë ni piën tye i
opii kanya acël k'ëthïnö mërë.

²⁶ Ëntö dhakö nökënë ca cung pï Jerucalem na
tye i polo; ën löörë kënë ëka ën ënë obedo aya onu.

²⁷ Piën ëcöö nï:

“Bed kï yom cwiny, in dhakö nï bedo alür,
na ba önywölö ëthïnö mörö;

red kï yom cwiny rwök,
in n'arem më nywöl ba ogoi;

piën ëthïnö ka dhakö na cwörë öwëkö pol
na löö ëthïnö ka dhakö na tye kï cwörë.”

²⁸ Utmegona, un ibedo ëthïnö më cikërë
k'Obanga, na calö Icaka.

²⁹ I karë nön, athïn n'ënywölö i kite më kom
obedo yelo athïn n'ënywölö pï tükö ka Tipo
k'Obanga, ëka röm aröma thon kobedini.

³⁰ Ëntö ngö na Cöc na Leng kobo? “Ryëm dhakö
n'obedo opii ökö kï wode, piën wode ba bino leeno
jami kanya acël kï wod ka dhakö na ba obedo
opii.”

³¹ Pï manön, utmegona, onu ba ebedo ëthïnö ka
dhakö n'obedo opii, ëntö ëthïnö ka dhakö na ba
obedo opii.

5

Kuc i Kiricito

¹ Onu dong ebedo jö më kuc piën Kiricito otyeko gönyö onu dong ökö kî i opii. Cung unu na tæk, ëka kür idök unu i opii më cîk dökî.

² Winy unu köpna, an, Paulo, kobedini akobo bothwu nî: Ka imïö ëliröwu, cê Kiricito bino bedo gin mörö na kõny mërë ope bothwu.

³ An anwö köpna dökî both dhanö acêlacêl na mïö ëlirë nî ën dong tye kî banya më lübö cîk kibêc.

⁴ Un jö na mitö nî êkwanwu nî kitewu atîr pî lübö cîk, un dong ityeko pokere ökö kenwu kî both Kiricito; inyikö unu ökö kî cecen kî kom kîca k'Obanga.

⁵ Pî Tipo Naleng, onu etye kî gen na thwönë rwök më nwongo kite n'atîr n'ëmïö pî yee.

⁶ Piën i Kiricito Yecu, lirë onyo bedo abonge lirë ope kî kõny mörö. Gin na kõnyö kékên ënë yee na tio kî mar.

⁷ Un onwongo itye ka ngwêc na bër. Nga n'öjüköwu më lübö köp më adyer?

⁸ Ëka pwony na calö man ba öya kî both Obanga n'ocwodowu.

⁹ Pwony më twodo ni cal kî thöbî na tîdî mörö na yenyö mökö ogati kibêc.

¹⁰ An atye kî gen i Rwoth nî thamawu ba bino pokere kî mëga. Ngat na tye ka mïöwu dönyö i arubaruba, Obanga bino pwodo kadî bed ën nga.

¹¹ Utmegona, ka an onwongo pod atitö niwu köp më lirë, pingö dökî pod eketho ayela i koma? Köp na makö yath ariä onwongo ba dökî römö bedo pëkö, ka an atitö nî lirë bër.

¹² An onwongo athamö nî ka twërë jö nön na tye ka rubowu kî köp më lirë myero ömëdërë gîni anyim ëka opudhere gîni kën-gî.

¹³ Utmegona, un yam ecwodowu më bedo kî kuc. Ëntö kür dök ilök unu kuc na mewu obed më cobo miti më kwö më anywöli. Nakaka timö kömanön, myero dhanö acêlacêl ömirê më könyö awodhe kî mar.

¹⁴ Piën cik kibêc ëribögî ökö i köp acêl kékên nî, “Mar awodhi na calö îmarö komi keni.”

¹⁵ Ëntö ka îkarê unu calö leeni më thim, cê myero îgwökêrê unu êk kür ithum unu ökö kenwu.

Tipo Naleng ëka kite ka dhanö

¹⁶ Gin na an akobo niwu ene, mîi unu Tipo Naleng ötêlwu, êk kür icob unu mitiwu më kwö më anywöli.

¹⁷ Piën miti më kwö më anywöli pyem kî miti ka Tipo Naleng, ëka miti ka Tipo Naleng pyem kî miti më kwö më anywöli. Gîn ariö ni dagêrê gîni, manön ënê gîn na jüköwu më timö gin na un îmitö.

¹⁸ Ëntö ka Tipo Naleng ënê tye ka têlôwu, un ba itye i thê cik.

¹⁹ Tic më miti më kwö më anywöli nen ökö kanya leng. Gîn ene: tim më ölyang, carö, tarwang,

²⁰ wörö cal jwogi, tic më jwöjwök, adagê, dhaa, nyeko, akëmö, larö dito, pyem, apokapoka,

²¹ woro, mërö, cem më yom cwiny na rac, kî mökö nökenê na calö manön gîni. Pod dökî aciköwu na têk, kite na calö aciköwu cön, nî jö na timö koth jami na calö man gîni, ker k'Obanga ba bino bedo mëgi.

²² Ëntö nyig na nyak pî Tipo Naleng ene: Mar, yom cwiny, kuc, diö cwiny, kîca, bër, gen,

²³ mwolo, ëka gwökërë kën. Cïk mörö ope na kwërö jami na calö man gïni.

²⁴ Jö n'obedo gïni jö ka Kiricito Yecu otyeko gïni guro miti më kwö më anywöli kï kite mërë kibëc i kor yath ariä.

²⁵ Tipo Naleng ömïö onu kwö, cë onu myero ewothu nakun ëlübö ën.

²⁶ Onu myero kür ebed k'awaka, kür ebed nyuthere rwök both ewodh onu, ëka kür ebed kï nyeko i kin onu.

6

Timö gin na bër both jö kibëc

¹ Utmegona, ka cë ëmakö dhanö mörö timö bal, un jö na Tipo Naleng tëlöwu myero iköny unu ën ëk odwog i yoo n'atir, nakun ikönyö unu ën kï cwiny më mwolo. Ëntö myero igwökërë unu ëk un thon kür ëtëmwu.

² Ting unu pëkö k'ewodhwu, manön ënë bino miöwu icobo cïk ka Kiricito.

³ Ka dhanö mörö thamö nï ën pïrë tæk ëlöö jö nökenë, nakun i adyer nwongo ën pïrë ba tæk, nwongo ën bwölërë kënë.

⁴ Dhanö acëlacël myero önën tic mërë kënë ka bër. Manön miö tyën köp më wakërë mërë bedo pï tic mërë kikome na ën otio, na ba dök poro kï tic ka ngat mörö nökenë,

⁵ pïën dhanö acëlacël tye kï yëc mërë na myero oting.

⁶ Dhanö n'etye ka pwonyo kï köp i kom Kiricito myero önywak jami kibëc na bëcö na ën tye ködë k'apwony mërë.

⁷ Kür iwëk ëbwölwu: Obanga ba etuko ködë. Gin na dhanö öcwö ënë ën thon bino kaö.

⁸ Ngat n'öcwö kodhi mërë i pwodho më miti më kwö më anywöli, gin na ën bino kaö ki ië ënë thöo, ëntö ngat n'öcwö kodhi mërë i pwodho ka Tipo Naleng, gin na ën bino kaö ki ië ënë kwö na ba thum.

⁹ Kür myero onu edher më tımö gin na bër, piën ka karë örömö, onu ebino kaö kac ka onu ba edhero.

¹⁰ Dong pi manön kite na onu pod etye ki karë, onu myero ëtim gin na bër both jö kibëc, na löö kibëc myero onu etii both utmego onu n'oye gini Kiricito.

Cik ka Paulo më ajiki

¹¹ Un itwëro nönö nyukuta na thwon na an atye ka cöönö ki cinga kikome.

¹² Jö nonu na tye ka tëmö më diöwu ni myero ilirë unu, obedo gini jö na mitö ni gin enen na bër both jö nökenë. Tyën köp na müögi timö ënë më jükö kür eketh ayela i komgi pi yath aria ka Kiricito.

¹³ Naka thon jö n'ëlrögi ba lübö gini cik, ëntö gin mitö ni ëlirwu ëk ewakërë gini pi lirë më komwu.

¹⁴ Ëntö an ba amitö ni awakara pi gin mörö, kono pi yath aria ka Rwoth onu Yecu Kiricito, ki kubotha lobo kibëc dong eguro ökö i kör yath aria, ëka an kikoma thon egura ökö i kom lobo pi yath aria.

¹⁵ Piën ka ngat mörö ëlirö onyo ba ëlirö, manön ba obedo gin mörö na pirë tək; gin na pirë tək ënë më bedo cwec na nyen.

¹⁶ Kuc ki kica obed i kom jö na lübö pwony ni, ëka both jö k'Obanga kibëc.

¹⁷ Cakërë kobedini cīdhō kōdē anyim, an ba amītō nī ngat mōrō oyela, piēn an atye kī poo na dong eketho ī koma na nyutho nī an abedo opii ka Yecu.

¹⁸ Utmegona mē amara, kīca ka Rwoth onu Yecu Kiricito obed kodwu. Amēn.

Leb-Thur

Thur: Leb-Thur (New Testament+) for Uganda

copyright © 2024 Wycliffe Bible Translators, Inc.

Language: (Thur)

Translation by: SIL Uganda

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-10

PDF generated using Haiola and XeLaTeX on 10 May 2025 from source files dated 10 May 2025

61e7f4da-dc0f-50a1-9dae-64ee1b392d80